

08 FEB 2000

Mahathir - Kongres

DR MAHATHIR SAMPAI UCAP UTAMA DI KONGRES PROFESIONAL MUDA MELAYU

KUALA LUMPUR, 8 Feb (Bernama) --Perdana Menteri Datuk Seri Dr Mahathir Mohamad akan menyampaikan ucap utama di Kongres Profesional Muda Melayu pada 26 Feb ini.

Timbalan Pengerusi Jawatankuasa Induk Kongres, Mukhriz Mahathir berkata kongres selama dua hari itu, yang bertemakan "Profesionalisme Melayu Mengharungi Cabaran K (Pengetahuan)-Ekonomi" akan diadakan di Pusat Dagangan Dunia Putra.

"Sebanyak 1,200 orang profesional muda Melayu berumur di bawah 40 tahun dijangka menghadiri kongres ini," katanya dalam persidangan berita, di sini hari ini.

Beliau berkata Timbalan Perdana Menteri Datuk Seri Abdullah Ahmad Badawi juga akan menghadiri sesi sidang pleno pada hari kedua kongres.

Tokoh lain yang akan berucap di kongres itu ialah bekas Menteri Luar, Tan Sri Ghazali Shafie yang akan membentangkan kertas kerja bertajuk "Sejarah Perjuangan Bangsa Melayu dan Kesannya Kini."

Presiden dan Ketua Eksekutif Sapura Holdings Berhad Datuk Shahril Shamsudin pula akan membentangkan kertas kerja bertajuk "Teknologi Maklumat dan Komunikasi Sebagai Landasan dan Teras Ekonomi Dekad Akan Datang."

Mukhriz berkata peserta kongres juga berpeluang menghadiri lima bengkel yang akan diadakan sepanjang kongres, membabitkan bidang pendidikan dan sumber manusia; agama, budaya dan sosial; keusahawan; ekonomi serta kewangan dan teknologi tinggi.

Beliau berkata individu yang ingin menyertai kongres itu boleh menghubungi urusetia pada talian 03-4622264 atau mendaftar secara terus melalui Internet melalui alamat www.kpmm.com.my.

Setiap peserta akan dikenakan bayaran RM100 seorang, katanya.

--BERNAMA

NY RI